

國朝耆獻類徵初編卷三百三十三目錄

忠義三

宋永譽

焦安民

曲良貴

侯嘉允等

瑚密色

色赫等

葉璽

漢楚哈

達蘇等

張思孟

李邦彥等

楊鑛

童士勤等

袁生芝

靳榜等

宋人望

張俊等

倭合納

色爾敏等

格布庫

西特庫等

陳六禮

子駁

袁捷

漆尙友等

李應宗

王紹基等

戴光升

賀朝賓等

傅世烈

方重朗等

王德教

王維新等

高咸臨

錢嘉倫等

吳允焯

潘際昌等

李可愛

子化春

密念敗等

阿囊阿

費揚住等

國朝耆獻類徵初編卷三百三十三

通奉大夫前署江西巡撫江西布政使司布政使湘陰李桓輯

忠義三

宋永譽

公諱永譽字葆恥汗驪其別號也中前明崇禎壬午科鄉試父學
韶萬厯壬午科舉人伯學道萬厯庚戌科進士世爲廣平府永年
人其事蹟載在家乘者不復贅公家學淵源淹貫博洽性復豪爽
不事生業闢精舍於洺水聰明山下寓意詩酒雅有范希文先憂
後樂之志人未之知也 本朝定鼎乙酉歲入都謁選授鳳翔府
郿縣令受命之日單車就任郿俗素悍且近終南稱盜藪頗難治

公莅任後日夜焦勞感以誠人皆勸凡征輸斷獄課士諸務雖倥偬搶攘中井井有條本年分校秋闈得士六人極一時之選人望歸焉時賀逆蓄異志久公憂之豫戒城守具躬率邑之慕義有膽識者畫戰守策紳士謂邑無重兵度不能禦公曰臣子之義誓與此土共存亡戰或不克守則無虞也亡何賀逆令賊黨持牌誘降給以重祿公立碎其牌禁錮賊役次夕賊遂薄城下攻五日夜公多方禦之勢不支城陷賊執公不忍殺復溫言勸公降公挺立罵不絕口索縣印不予賊怒手刃公督府孟公喬芳稱其一死盡節忠烈可憫撫軍雷公興稱其爲國盡忠死賢於生會議上其事請卹典得 旨追贈陝西按察司僉事廕一子入監讀書

右傳魏象樞撰

按賀逆攻郢城
係順治二年

[illegible]

焦安民

焦安民漢軍正紅旗人初授吏部啟心郎崇德九年甄別各部院
官安民列二等 賜人戶牲畜八年考滿授佐領順治元年遷山
西雁平道二年四月擢甯夏巡撫疏言雁平村舍凋零寇盜充斥
守備上官清都司鄭應亨晝夜巡緝士民得安請攜二人隨往甯
夏委用 從之十一月 上諭督撫等宜力封疆躬勤勞苦茲值
嚴寒尤深注念 賜安民縣裘貂褂各一十一月疏言臣巡歷河
東諸營堡惟靈州營水灌沃壤兵多務農餉或不足猶可藉農養
贍其餘營堡兵皆鶻衣百結鵠立難支查靈營西南有民堡八向
招人耕種屯糧以供兵馬需近因花馬興武等營歲荒將此項屯

糧通融分給以資接濟伏思守土在軍足食在農斯時有荒可壅
苦無牛隻見存耕牛六十一隻堪給兵開墾又原任總兵南一魁
將舊存馬價銀二百兩製弓矢攜去應追原價入庫甯驛久廢稽
延公務請將此銀買驢贏發附郭等驛稍供走遞庶齎奏無誤又
言甯兵月餉見在屯課征收者支放殆盡貧民逋欠者追比難完
三軍枵腹待哺請撥秦餉三萬兩以濟飢兵下部議如所請三年
三月副將王元馬德以營兵趙銳等罪責入獄乘輦統眾突入撫
署安民遇害元德等尋伏誅安民 贈右都御史廕一子 賜祭
葬如例

右 國史館本傳

曲良貴

侯嘉允等

曲良貴直隸獻縣人由貢生知陝西興安州事順治三年四月叛賊孫守法糾流賊劉二虎等圍州城良貴與州判侯嘉允參將康國安率眾捍禦賊攻兩月不克而城內亦糧盡援絕攻益急奸民內應五月晦啟門納賊執嘉允不屈殺之良貴亦罵賊死并殺國安及中軍鄔鳴雷都司姚永燾陳光斌千總郭君敬金國華守禦所千戶尤英百戶張爾謀等八人邑紳陳正道梁時煌蔣玉衡唐醇儒舉人單興詩等五人生員吳錦譚達文束調鼎王者輔等五十餘人興安陷遂及石泉縣主簿胡孟遴典史夏德化皆死之是年十二月賊胡向宸聚黑水谷倚蕎麥山之險四出剽掠都司張

偉勦之次年正月遇於桃園溝力戰陣亡又鳳翔土寇李啟陽與
向宸同時倡逆據麟游清涼寺嘯聚數千人掠村堡道府集鄉勇
守禦聞鳳翔武生李增廣多勇略俾督其眾屢與賊戰多斬獲一
日賊大至增廣迎敵馬蹶遇害四年議卹 詔贈良貴布政司參
議廕一子入監嘉允孟遴俱 贈經歷德化 贈主簿餘卹如例
嘉允陝西人永燾直隸宣化人父熙吾官興安州知州隨至任值
鄰邑洵陽失守民多赴興安避亂永燾訓練保障全活甚眾參將
康國安薦其才授興安中營都司至是與國安並及於難興詩明
天啟丁卯舉人餘俱無考

瑚密色 色赫等

瑚密色滿洲鑲黃旗人姓佟佳世居加哈天聰初來歸以佐領銜駐防天瑞山斬逃卒六十級擒五十人崇德元年隨貝勒阿濟格証明設伏昌平敗明騎五百趨通州斬哨兵百人偵盧溝橋敗倭卒前後獲馬百餘匹還取紅衣大廠道遇明太監郭某及總兵祖大弼戰卻之旋率八旗前鋒薄明都敗其兵東略遵化擒哨騎二千復西至盧溝明師自保定來援擊敗之生擒十三人九月隨貝勒多爾袞攻明松山敗其總兵祖大壽四年攻杏山斬獲甚眾額爾克岱青部卒有陷於陣者力援出之五年從圍錦州左翼兵猝遇敵瑚密色先登奮擊明師退又敗之於杏山敘功授雲騎尉七

年從奉命大將軍阿巴泰伐明次豐潤破明督師范志完兵追至
玉田明千總二人率兵夜窺我師擊走之八年大兵下山東從攻
青州取其芻卒復敗敵於德州城北明將司馬獻來擾偕騎都尉
色赫擊之退我兵有科爾沁二人中刃爲敵所困瑚密色躍馬直
入挾之出師旋至桑乾河結浮梁以濟志完躡我後偕副都統納
爾特還擊生擒遊擊一人明師潰因與阿爾布尼鄂碩及副都統
鄂羅賽臣殿志完復遣將追襲連卻其眾順治元年從入山海關
擊流賊敗僞總兵唐通於一片石追至安肅斬獲無算先驅至望
都再殲賊復同都統譚泰逐北數十里二年擢佐領授雲騎尉世
職十月瑚密色色赫及參領王元爵隨豫親王多鐸出征取潼關

時賊結陣於山瑚密色同鄂碩奮登賊下山遁遂據其山賊騎散而復合率前鋒兵乘勢馳下賊皆披靡別隊犯圖賚軍復助擊破之又設伏敗賊馬步兵數千三年五月大兵下江南色赫王元爵俱在事有功瑚密色破明兵二千餘於句容明兵復合進偪我軍瑚密色直前衝突明兵大敗色赫擊敗明總兵黃蜚等於蘇時明魯王朱以海踞紹興浙江列郡多應之六月多羅貝勒博洛征浙令王元爵徇湖州土兵蜂至元爵戰歿博洛次杭州魯王遣其督師侍郎孫嘉績熊汝霖渡錢塘江來犯瑚密色色赫等擊敗嘉績兵擒其隊帥追至江中汝霖兵殊死鬪瑚密色中槍戰歿色赫從定浙江旋下福建還過平湖遇土寇亦以中槍陣亡色赫蒙古鑲

藍旗人姓墨勒濟世居哈達以佐領從圍錦州敗明總督洪承疇
騎兵遂遷騎都尉王元爵漢軍正紅旗人以軍功授佐領擢參領
議卹瑚密色 贈二等輕車都尉子薩碧圖襲色赫王元爵並
贈雲騎尉元爵子秉恭襲職從子秉政以佐領擢陝西駐防參領
順治八年從征四川明桂王朱由榔所署總督龍名揚據敘州擊
之陣亡 贈雲騎尉

右 國史館本傳

葉璽

葉璽滿洲鑲白旗人姓果羅洛氏祖常舒爲沾阿寨長 太祖高
皇帝初業時同其弟揚舒率眾來歸從征尼堪外蘭及誅諸察納
皆在事有功尋擢任大臣以其子布哈圖察哈喇並爲佐領葉璽
布哈圖之子也 太宗文皇帝崇德三年以護軍參領隨睿親王
多爾袞征明由青山口毀邊牆入破薊遼總督吳阿衡軍五年圍
錦州擊敗杏山騎兵及松山步兵 世祖章皇帝順治元年隨英
親王阿濟格征流賊李自成二年正月至延安府賊兵出犯葉璽
同左翼兵奮擊大敗之李自成尋遁走湖廣大兵進擊抵安陸府
獲賊船四復同護軍統領哈甯阿自大江追擊流賊至富池口奪

其戰艦賊復列陣岸上又擊敗之尋還京三年四月蘇尼特部騰
機思騰吉特等叛奔喀爾喀葉璽隨豫親王多鐸貝子博和託等
征之屢擊敗賊眾追至布爾哈圖山擒斬七人招降喀爾喀二十
五戶七月師自圖拉河西行至扎濟布拉克遇喀爾喀土謝圖汗
兩子率兵二萬來犯葉璽力戰歿於陣 賜卹 贈護軍統領子
騎都尉世職世襲罔替無子以弟之子額爾遜襲 世宗憲皇帝
雍正二年建昭忠祠以葉璽入祀葉璽兄之子辰部錄初任佐領
兼工部理事官崇德三年隨睿親王多爾袞征明山東攻克陽信
縣城順治三年隨定南大將軍和洛輝擊敗賊賀珍兵於漢中又
隨肅親王豪格征流賊張獻忠同護軍參領達素鄂摩克圖等屢

挫賊鋒師還賊躡其後復同前鋒參領錫卜臣還擊敗之兩遇
恩詔予騎都尉世職十一年從征海賊鄭成功至浙江舟山與署
護軍統領巴雅達敗僞總制陳六御等敘功晉世職爲三等輕車
都尉十七年卒子瑪晉襲

右 國史館本傳